

## Quann'era nicu

Quann'era nicu,  
ora tu ricu,  
u pani, u pumu na sacchetta,  
mi ni eva a travagghari ca bricichetta;  
eva a scola macari  
e nun ci eva pi ghiucari,  
ma a casa mia  
era a Badìa.

A San Cirinu  
era a squattra do' parrinu  
Patri di Stefanu ogni ura i campani mi faceva sunari  
picchi a genti a vò sapiri:  
a dhi tempi nun c'erunu i meccanismi  
ora ci sunu i sincronismi.

Prima di iri a missa  
facevumu na scummissa  
picchè era raru  
di fari arrivari a badha finu o' campanaru;  
unu c'era  
e u sapiti cu era  
ca, prima di rarici u cauci, a badha ammaccava  
Franco Scammacca si chiamava.

lucavamu ca' badha scoppia di umma  
ca quannu n'arrivava 'ncodhu, ricevumu: "minghia comu na sgumma!"  
lucavamu che' chiappedhi, a ria e a fossetta  
mentri n'ammuccavamu na' puppetta  
e che manu tutti 'nzivati di sassa  
arrivavamu finu a Puttazza.

lucavumu macari che' nucidhi  
pi canciari scuccidhi e capidhi.  
Vicinu a chiesa di Santa Mariula  
c'era macari 'na biviratura,  
ma quanta zimma si faceva  
ca cu passava scidhicava.

A Mafàdda  
na mangiavumu ca' cremabba,  
u ghiacciu pistatu  
era megghiu do' gilatu;  
lucavamu ca' terra e quantu così ni fricavumu ne' renti,  
ma nun avevumu mai nenti;  
ora semu tutti sofisticati  
e ogni picculu ruluri semu allammati.

Na machina nun si puteva accattari  
picchè ci vulevunu tanti rinari,  
tanta genti caminava a peri o ca' bricichetta  
e a vita nostra era chiù protetta;  
ora ca i mezzi usamu  
a biriri quantu pisamu!  
e si stu rassu vulemu sgradhari  
na' ma ferì currennu, picchi prima a m'arrivari.

**PIPPO BOSCO**